



Předsyda Domowiny Dawid Statnik je wčera sakskeho ministerskeho prezidenta Stanisława Tilicha a zwjazkowu kanclerku Angelu Merkel zhromadnje z Rebeccu Lipičec a Terezu Neterec z chłěbom a selu w Budyšinje witał. Na wólbnyim zarjadowanju běštaj tež Marko Šiman a Alojs Mikławš (wotlěwa). (Dalše wobrazy pod www.serbske-nowiny.de) Foto: SN/M. Bulank

Kanclerka Budyšin wopytała

Angela Merkel so za sylnjenje serbstwa wuprajila

Budyšin (SN/JaW). Němske knježerstwo budže serbsku rěč a kulturu tež přichodnje spěchowac. Tole je zwjazkowa kanclerka Angela Merkel (CDU) na swojim wopyće wčera w Budyšinje wobkrućila. „Znaju Serbow a wěm, zo so Marja Michałkowa sylnje za serbske naležnosće zasadza. A sakski ministerski prezident Stanisław Tilich je Serb a je tule w Budyšinje do šule chodźil. Hdyžkuli w zwjazkowym sejmje w Berlinje serbske temy wobjednawamy, zasadza so Marja Michałkowa jara za sylnjenje serbstwa, tež ja za to sym.“ Tole rjekny kanclerka wčera na wólbnyim zarjadowanju CDU na Budyšich Žitnych wikach, hdžež sakska CDU mócnje za sebje wabješe.

Předsyda Domowiny Dawid Statnik je kanclerku Merkel kaž tež ministerskeho prezidenta Tilicha a dalších politikarjow zhromadnje z holcomaj w serbskej narodnej drasće po starym słowjanskim wašnju z chłěbom a selu witał. Dwurěčne serbsce a němsce witał je k zadběje

zarjadowanja wšitkich přitomnych tež Stanisław Tilich. „Džakuju so wam wšěm, zo sće sem přišli a zo smy džensa zhromadnje z Angelu Merkel tu w Budyšinje pod Bohatej wěžu,“ wón ludžom přiwoła.

Ličby wo wčera přitomnych zajimcach z Budyšina kaž tež z blišeje a zdalenišeje wokoliny su rozdźelne. Po zdělenju CDU bě nimale 5 000 ludźi přišlo, zo bychy kanclerku widželi, mjez nimi tež tójšto Serbow. Jedna Serbowka bě so tež narodnu drastu woblekla. Regionalne medije rozprawjachu porno tomu wo něšto wjac hač 2 000 ludžoch.

Hižo do wopyta zwjazkoweje kanclerki a sakskeho ministerskeho prezidenta mějachy wjacori kandidaća CDU składnosć so předstajic. Nimo Franka Hirchi z Wojerec porěčestaj tež serbskaj kandidataj za wólby krajneho sejma Alojs Mikławš a Marko Šiman. Na wabjenkim zarjadowanju skedźbnichu woni na wuspěchi politiki swojeje strony, njezatajichu pak tež naležnosće, kotřež so

dotal njejsu poradźili. „Sym hordy na to, kelko mocy su moji krajenjo za Hornju Łužicu naložili, něšto nowe natwarili a kak su region wubědžowanjakmany sćinili“, rjekny Šiman.

Předstajenje kandidatow za wólby sakskeho sejma a wopyt němskeje kanclerki w sprjewinym měsće wobrubichu wjacore sportowe a kulturne cyłki na Žitnych wikach z programom. Mjez druhim bě tež Smjerdžečanska rejwanska skupina z někotrymi pokazkami zastupjena, za což žněješe sylny aplaws.

Sakski premier Stanisław Tilich a zwjazkowa kanclerka Angela Merkel staj w narěčomaj tohorunja mócnje wo hłosy za swoju stronu wabiłoj. Na tym njemóžachu tež wjacori napřećiwni demonstrancja, kotřiž wótrje swoje parole do megafona rjejachu, ničo změnic. Či mjez druhim mjenjachu, zo su přitomni politikarjo „wójnsy škaracy“. Tilich kaž tež Merkel měrnje na protest reago-waštaj, wužiwoju jón za swoje zaměry.